



პერსონალურ მონაცემთა დაცვის ინსპექტორი

გადაწყვეტილება №გ-1/034/2016

გ.პ.-ს განცხადების განხილვის დასრულების შესახებ

ქ. თბილისი

16/02/2016

განმცხადებელი - გ.პ (პ/ნ *****)

მოთხოვნა - განმცხადებელი პერსონალურ მონაცემთა დაცვის ინსპექტორისგან ითხოვს დადგინდეს თუ რატომ არ ხდება შინაგან საქმეთა სამინისტროს მიერ ადმინისტრაციული სამართალდარღვევების შესახებ ინფორმაციის წაშლა ან განახლება ხანდაზმულობის გამო.

აღწერილობითი ნაწილი

2015 წლის 07 აგვისტოს პერსონალურ მონაცემთა დაცვის ინსპექტორს №01/495 განცხადებით მომართა მოქალაქე გ.პ.-მ განცხადების თანახმად, 2015 წლის 24 ივლისს ბათუმი-თბილისის გზაზე მდებარე პოლიციის ერთ-ერთ შენობასთან განმცხადებელი გაესაუბრა პოლიციის თანამშრომელს, რომელმაც განუცხადა, რომ შეეძლო ეჩვენებინა და შემდგომ მას უჩვენა პოლიციის შენობაში არსებული კომპიუტერის მეშვეობით 2006 წლიდან 2015 წლამდე მისთვის ადმინისტრაციული სამართალდარღვევისთვის დაკისრებული ჯარიმების შესახებ ინფორმაცია. განმცხადებელი პერსონალურ მონაცემთა დაცვის ინსპექტორისგან ითხოვდა დადგენილიყო, რატომ არ ხდება სამინისტროს მიერ ადმინისტრაციული სამართალდარღვევების შესახებ ინფორმაციის წაშლა ან განახლება ხანდაზმულობის გამო.

პერსონალურ მონაცემთა დაცვის ინსპექტორის 2015 წლის 11 აგვისტოს №გ-1/112/2015 გადაწყვეტილებით მოქალაქე გ.პ.-ს განცხადება მიღებულ იქნა განსახილველად. განცხადების განხილვის ფარგლებში, 2015 წლის 11 აგვისტოს №658/01, 2015 წლის 09 სექტემბრის №755/01 და 2015 წლის 06 ოქტომბრის №851/01 წერილებით, სამინისტროდან

გამოთხოვილ იქნა ინფორმაცია მოქალაქე გ.პ.-ს ადმინისტრაციული სამართალდარღვევების შესახებ მონაცემთა დამუშავების, აღნიშნული მონაცემების საპატრულო პოლიციის თანამშრომლებისათვის ხელმისაწვდომობის და მონაცემების შენახვის ვადის შესახებ.

სამინისტროს მიერ, დაგვიანებით, 2015 წლის 13 ოქტომბერს №MIA 9 15 02255662 წერილით წარმოდგენილ იქნა გამოთხოვილი ინფორმაცია. ინფორმაციის წარმოდგენის დაგვიანების საფუძველად მითითებულია, „საქართველოს სახელმწიფო უსაფრთხოების სამსახურის შესახებ“ საქართველოს კანონის შესაბამისად, შინაგან საქმეთა სამინისტროსგან საქართველოს სახელმწიფო უსაფრთხოების სამსახურის გამოყოფის პროცესით გამოწვეული ტექნიკური შეფერხება (სამინისტროს 2015 წლის 19 აგვისტოს №MIA 4 15 01820507 და 2015 წლის 17 სექტემბრის №MIA 1 15 02056557 წერილები). წარმოდგენილი ინფორმაციით „საქართველოს შინაგან საქმეთა სამინისტროს ფაილური სისტემებისა და მათში არსებული მონაცემების შენახვის ვადების განსაზღვრის შესახებ“ საქართველოს შინაგან საქმეთა მინისტრის 2015 წლის 23 იანვრის №53 ბრძანებით დამტკიცებული სამინისტროს ფაილური სისტემებისა და მათში არსებული მონაცემების შენახვის ვადებთან დაკავშირებული დანართის მე-6 პუნქტის თანახმად, სამინისტროში ადმინისტრაციული სამართალდარღვევების შესახებ მონაცემების შენახვის ვადა არის 04 (ოთხი) წელი, ხოლო დაარქივება განსაზღვრულია უვადოდ. რაც შეეხება მოქალაქე გ.პ.-ს მიმართ 2006-2010 წლების ადმინისტრაციული სახდელების გამოყენების შესახებ ინფორმაციას, წერილში მითითებულია რომ სამინისტროს საპატრულო პოლიციის დეპარტამენტის თანამშრომლებისათვის აღნიშნული ინფორმაცია ხელმისაწვდომი არ არის.

ვინაიდან, გ.პ. განცხადებაში უთითებდა, რომ პოლიციის თანამშრომელმა უჩვენა პოლიციის შენობაში არსებული კომპიუტერის მეშვეობით 2006 წლიდან 2015 წლამდე მისთვის ადმინისტრაციული სამართალდარღვევისთვის დაკისრებული ჯარიმების შესახებ ინფორმაცია, ხოლო სამინისტრომ წერილში მიუთითა, რომ აღნიშნული ინფორმაცია საპატრულო პოლიციის დეპარტამენტის თანამშრომლებისათვის ხელმისაწვდომი არ არის, ურთიერთსაწინააღმდეგო ფაქტობრივი გარემოებების გამო, პერსონალურ მონაცემთა დაცვის ინსპექტორის 2015 წლის 28 ოქტომბრის №03/62 ბრძანების შესაბამისად განხორციელდა საქართველოს შინაგან საქმეთა სამინისტროს შემოწმება. შემოწმება მოიცავდა გ.პ.-ს მიმართ დაკისრებული ადმინისტრაციული სახდელების შესახებ ინფორმაციის დამუშავების, კერძოდ, მონაცემების შენახვის, გამოყენებისა და გამჟღავნების კანონიერების შესწავლის მიზნით სამინისტროს შემოწმებას.

შემოწმების შედეგად დადგინდა:

- სამინისტრო ადმინისტრაციული სამართალდარღვევების შესახებ არსებულ პერსონალურ მონაცემებს ამუშავებს საქართველოს ადმინისტრაციულ სამართალდარღვევათა კოდექსის 270-ე მუხლისა და „საქართველოს შინაგან საქმეთა სამინისტროში ადმინისტრაციულ სამართალდარღვევათა ერთიანი აღრიცხვის, საინფორმაციო ბანკის

ფუნქციონირებისა და სააღრიცხვო-ანალიტიკური საქმიანობის შესახებ ინსტრუქციის დამტკიცების თაობაზე“ საქართველოს შინაგან საქმეთა მინისტრის 2006 წლის 01 მარტის №271 ბრძანების საფუძველზე;

- „საქართველოს შინაგან საქმეთა სამინისტროს ფაილური სისტემებისა და მათში არსებული მონაცემების შენახვის ვადების განსაზღვრის შესახებ“ საქართველოს შინაგან საქმეთა მინისტრის 2015 წლის 23 იანვრის №53 ბრძანებით დამტკიცებულია სამინისტროს ფაილურ სისტემებში არსებული მონაცემების შენახვის ვადები. აღნიშნული ბრძანების დანართის მე-6 პუნქტის თანახმად, სამინისტროში ადმინისტრაციული სამართალდარღვევების შესახებ მონაცემების შენახვის ვადა არის 04 (ოთხი) წელი, ხოლო დაარქივება ხორციელდება უვადოდ. სამინისტროში პერსონალური მონაცემების დაარქივებასთან დაკავშირებული პროცედურა დაიწყო მინისტრის 2015 წლის 23 იანვრის №53 ბრძანების ძალაში შესვლის დღიდან და დასრულდა 2015 წლის 01 ოქტომბერს;
- „საქართველოს შინაგან საქმეთა სამინისტროს ცენტრალური საინფორმაციო ბანკის მონაცემთა ინფორმაციულ რესურსებთან დაშვების ზოგიერთი საკითხის მოწესრიგების შესახებ“ საქართველოს შინაგან საქმეთა მინისტრის 2013 წლის 11 ნოემბრის №860 ბრძანებით რეგულირდება სამინისტროს უფლებამოსილი თანამშრომლისათვის ცენტრალურ საინფორმაციო ბანკის მონაცემთა ინფორმაციულ რესურსებთან დაშვების წესი, რომლის თანახმადაც სამინისტროს სისტემის, მისი სტრუქტურული ქვედანაყოფის, ტერიტორიული ორგანოების, სამინისტროს საქვეუწყებო დაწესებულების ხელმძღვანელები მიმართავენ საინფორმაციო-ანალიტიკურ დეპარტამენტს, რომელიც დასაბუთებული მოთხოვნის არსებობის შემთხვევაში, იღებს გადაწყვეტილებას ყოველ კონკრეტულ თანამშრომელზე ერთჯერადი რიცხვითი პაროლის გენერირების მოწყობილობის (Digipass) გაცემის თაობაზე. უკვე დაარქივებულ ინფორმაციულ რესურსებთან წვდომაზე დაშვება კი, ხდება მხოლოდ სამინისტროს საინფორმაციო-ანალიტიკური დეპარტამენტისთვის მონაცემებთან წვდომის საჭიროების შესახებ დასაბუთებული მიმართვის საფუძველზე;
- საქართველოს შინაგან საქმეთა სამინისტროს საპატრულო პოლიციის თანამშრომლებს, ვისზეც დადგენილი წესის შესაბამისად გაცემულია ერთჯერადი რიცხვითი პაროლის გენერირების მოწყობილობა, ცენტრალური საინფორმაციო ბანკის მონაცემთა ინფორმაციულ რესურსებთან წვდომის უფლება აქვთ 04 (ოთხი) წლის მონაცემებზე;
- გ.პ.-ს მიმართ გამოყენებული ადმინისტრაციული სახდელების შესახებ ინფორმაცია, საპატრულო პოლიციის თანამშრომლების მიერ გადამოწმდა არა 2015 წლის 24 ივლისს, როგორც ეს განმცხადებლის მიერ არის მითითებული, არამედ ამავე წლის 21 ივლისს, რაც დასტურდება სამინისტროს ბაზაში შესაბამისი ელექტრონული ჩანაწერის - „ლოგის“ არსებობით. 2015 წლის 20-28 ივლისის პერიოდში, 2011 წლამდე გ.პ.-ს ადმინისტრაციული სახდელების შესახებ ინფორმაცია შეიძლება ხელმისაწვდომი ყოფილიყო საპატრულო პოლიციის თანამშრომლისთვის, ვინაიდან იმ დროისათვის

მონაცემების დაარქივების პროცესი მიმდინარეობდა და სრულად დასრულებული არ იყო;

- ადმინისტრაციულ სამართალდარღვევათა შესახებ მონაცემების დაარქივებას ახორციელებს და ლოგირების სისტემას ზედამხედველობს სახელმწიფო უსაფრთხოების სამსახური, სტრუქტურული ქვედანაყოფი - ოპერატიულ-ტექნიკური დეპარტამენტის მეშვეობით;
- ერთიან საინფორმაციო ბანკში პირის მიერ ბოლო ოთხი წლის განმავლობაში ჩადენილი ადმინისტრაციულ სამართალდარღვევების შესახებ მონაცემებზე წვდომის საჭიროების დასაბუთებისას სამინისტრო მიუთითებს „პოლიციის შესახებ“ საქართველოს კანონის მე-17 მუხლის მეორე პუნქტის „გ“, „დ“, „ე“ ქვეპუნქტებზე და საქართველოს ადმინისტრაციულ სამართალდარღვევათა კოდექსის 33-ე, 35-ე, 39-ე და 116-ე მუხლებზე. სამინისტროს მტკიცებით, 04 (ოთხი) წლის ვადით მონაცემთა შენახვა წარმოადგენს იმ გონივრულ მინიმუმს, რომელიც აუცილებელია მონაცემთა დამუშავების მიზნის მისაღწევად, რათა სამინისტროს უფლებამოსილმა პირებმა მოახდინონ ადმინისტრაციული სამართალდარღვევებისთვის კანონმდებლობით გათვალისწინებული სამართლებრივი რეაგირება და ადმინისტრაციული სამართალდარღვევის შესახებ მიიღონ შესაბამისი გადაწყვეტილება.

04 (ოთხი) წლის ვადით მონაცემთა შენახვის შესახებ გადაწყვეტილებას საფუძვლად დაედო ასევე, სამინისტროს მიერ საზოგადოებისა და ქვეყნის უსაფრთხოების დაცვის მიზანი. საზოგადოებრივი უსაფრთხოების და მართლწესრიგისათვის საფრთხის თავიდან აცილების, ამასთანავე, ადამიანის უფლებებისა და თავისუფლებების დაცვის, დანაშაულისა და სხვა სამართალდარღვევათა თავიდან აცილებისა და აღკვეთის მიზნით პრევენციული ღონისძიებების განხორციელებისთვის ამგვარი ინფორმაცია მნიშვნელოვანია საპატრულო პოლიციის თანამშრომლებისთვის.

შემოწმების ფარგლებში, განმცხადებლის - გ.პ.-ს შესახებ მონაცემების სამინისტროს ცენტრალური საინფორმაციო ბანკის მონაცემთა ბაზასა და საპატრულო პოლიციის ავტომობილში დამონტაჟებულ კომპიუტერში გადამოწმების შედეგად კი, დადგინდა:

- საპატრულო პოლიციის ავტომობილში დამონტაჟებულ კომპიუტერში ხელმისაწვდომი იყო მხოლოდ გ.პ.-ს ადმინისტრაციული სამართალდარღვევების შესახებ ბოლო ოთხი წლის ინფორმაცია;
- სამინისტროს ცენტრალურ საინფორმაციო ბანკის მონაცემთა ბაზაში, ბოლო 04 (ოთხი) წლის ინფორმაციასთან ერთად, ხელმისაწვდომი იყო 2008 წელს ადმინისტრაციულ სამართალდარღვევათა კოდექსის 173-ე მუხლით გათვალისწინებული ადმინისტრაციული სამართალდარღვევის ჩადენის გამო გ.პ.-ს ადმინისტრაციული პასუხისმგებლობის დაკისრების შესახებ ინფორმაციაც. სამინისტროს განმარტებით,

აღნიშნული განსხვავება განპირობებული იყო სამინისტროში მიმდინარე დაარქივების პროცესის სინქრონიზაციის გამო. ასეთი ინფორმაცია ხელმისაწვდომი იყო მხოლოდ სამინისტროს მონაცემთა ბაზის ადმინისტრატორისთვის, რომლის მეშვეობითაც მოხდა აპარატის თანამშრომლების მიერ ბაზის დათვალიერება. სამინისტროს მონაცემთა ბაზის სხვა მომხმარებლებისთვის ასეთი ინფორმაცია ხელმისაწვდომი არ არის. სამინისტროს განმარტებით, მიმდინარე სინქრონიზაციის პროცესი უახლოეს პერიოდში (ზუსტი თარიღი არ არის ცნობილი) დასრულდება და აღნიშნული მონაცემები დაარქივდება.

2015 წლის 24 ნოემბერს, გ.პ.-ს შესახებ მონაცემების დამუშავებისას მონაცემთა დამუშავების პრინციპების დარღვევის გამო, შედგენილ იქნა ადმინისტრაციული სამართალდარღვევის ოქმი №0000065. სამინისტროს წარმომადგენელი არ დაეთანხმა ადმინისტრაციული სამართალდარღვევის ოქმს და განმარტა, რომ გ.პ.-ს 2008 წლის ადმინისტრაციულ სამართალდარღვევის შესახებ ინფორმაცია ხელმისაწვდომია მხოლოდ სამინისტროს მონაცემთა ბაზის ადმინისტრატორისათვის, რაც გამოწვეულია სამინისტროში მიმდინარე დაარქივების პროცესის სინქრონიზაციით. ამასთან მნიშვნელოვანია, რომ აღნიშნული ინფორმაცია მონაცემთა ბაზაზე წვდომის უფლების მქონე პირებისთვის არ არის ხელმისაწვდომი.

სამოტივაციო ნაწილი

1. საქართველოს შინაგან საქმეთა სამინისტროს მიერ გ.პ.-ს მიერ ჩადენილი ადმინისტრაციული სამართალდარღვევების შესახებ მონაცემების დამუშავების კანონიერება

საქართველოს ადმინისტრაციულ სამართალდარღვევათა კოდექსის 270-ე მუხლის თანახმად, ადმინისტრაციული სამართალდარღვევის ოქმის შემდგენი და საქმის განმხილველი ორგანოები ვალდებული არიან ამ კოდექსით გათვალისწინებულ ადმინისტრაციულ სამართალდარღვევათა ოქმის შედგენიდან ან/და დადგენილების გამოტანიდან 10 დღის ვადაში აცნობონ საქართველოს შინაგან საქმეთა სამინისტროს შესაბამის სტრუქტურულ ქვედანაყოფს (ერთიან საინფორმაციო ბანკს).

„პოლიციის შესახებ“ საქართველოს კანონის მე-17 მუხლის მეორე პუნქტის „ე“ ქვეპუნქტის თანახმად, პოლიცია საკუთარი ფუნქციების შესრულების უზრუნველსაყოფად თავისი კომპეტენციის ფარგლებში რეაგირებს სამართალდარღვევის ფაქტებზე, კერძოდ: იღებს და რეგისტრაციაში ატარებს შემოსულ ინფორმაციას დანაშაულისა და სხვა სამართალდარღვევათა შესახებ, უგზო-უკვლოდ დაკარგულ პირთა შესახებ, დაუყოვნებლივ რეაგირებს მათზე, აღრიცხავს სამართალდარღვევებსა და მათ ჩამდენ პირებს. საქართველოს მთავრობის 2013 წლის 13 დეკემბრის № 337 დადგენილებით დამტკიცებული საქართველოს შინაგან საქმეთა სამინისტროს დებულების მე-10 მუხლის „ზ“ პუნქტის თანახმად,

სამინისტროს სტრუქტურული ქვედანაყოფის - საინფორმაციო-ანალიტიკური დეპარტამენტის ერთ-ერთი ძირითადი ამოცანაა ადმინისტრაციულ სამართალდარღვევათა ერთიანი აღრიცხვა, საინფორმაციო ბანკის ფუნქციონირების უზრუნველყოფა და სააღრიცხვო-ანალიტიკური საქმიანობა.

საქართველოს შინაგან საქმეთა მინისტრის 2006 წლის 01 მარტის №271 ბრძანებით დამტკიცებულია საქართველოს შინაგან საქმეთა სამინისტროში ადმინისტრაციულ სამართალდარღვევათა ერთიანი აღრიცხვის, საინფორმაციო ბანკის ფუნქციონირებისა და სააღრიცხვო-ანალიტიკური საქმიანობის შესახებ ინსტრუქცია.

ინსტრუქციის მე-2, მე-8, მე-14 და მე-15 მუხლების თანახმად, გამოვლენილ ადმინისტრაციულ სამართალდარღვევათა აღრიცხვის, მონაცემების ცენტრალიზების, ავტომატიზაციის და ერთიან სისტემაში მოყვანის მიზნით, სამინისტროში შექმნილია ადმინისტრაციულ სამართალდარღვევათა აღრიცხვის ერთიანი საინფორმაციო ბანკი, რომლის ფუნქციონირება ეხმარება ადმინისტრაციული სამართალდარღვევის გამომვლენ და საქმის განმხილველ ორგანოებს ადმინისტრაციულ სამართალდარღვევათა აღრიცხვისა და პასუხისმგებლობის ზომების კანონიერად და ეფექტურად გამოყენების საქმეში. განმეორებით ჩადენილ ადმინისტრაციულ სამართალდარღვევათა გამოვლენისა და პასუხისმგებლობის განსაზღვრის მიზნით, შესაბამისი ორგანოები ვალდებული არიან ადმინისტრაციულ სამართალდარღვევაზე დამრღვევი პირის მიმართ გადაწყვეტილების მიღებამდე გადაამოწმონ ამ პირზე მონაცემები ერთიან საინფორმაციო ბანკში.

აქედან გამომდინარე, საქართველოს შინაგან საქმეთა სამინისტროს მიერ განმცხადებლის - გ.პ.-სთვის დაკისრებული ადმინისტრაციული სამართალდარღვევების შესახებ მონაცემების დამუშავება შეგროვების, შენახვის, გამოყენების გზით ხორციელდება „პერსონალურ მონაცემთა დაცვის შესახებ“ საქართველოს კანონის მე-5 მუხლის „ბ“ და „გ“ პუნქტების შესაბამისად - მონაცემთა დამუშავება დასაშვებია, თუ ეს გათვალისწინებულია კანონით და მონაცემთა დამუშავება საჭიროა მონაცემთა დამმუშავებლის მიერ მისთვის კანონმდებლობით დაკისრებული მოვალეობების შესასრულებლად.

რაც შეეხება განმცხადებლის მიერ განცხადებაში მითითებულ მონაცემთა გადამოწმების ფაქტს, შემოწმების შედეგად დადგინდა, რომ საპატრულო პოლიციის თანამშრომლების მიერ ასეთ გადამოწმებას ადგილი ჰქონდა 2015 წლის 21 ივლისს, რაც დასტურდება სამინისტროს ბაზაში შესაბამისი ელექტრონული ჩანაწერის - „ლოგის“ არსებობით. განმცხადებლის მიერ მითითებული ინფორმაციიდან დგინდება, რომ მონაცემთა გადამოწმება საპატრულო პოლიციის თანამშრომლის მიერ განხორციელდა შესაბამისი სამსახურებრივი საჭიროების გარეშე - განმცხადებელთან გამოლაპარაკების შედეგად, საპატრულო პოლიციის თანამშრომელმა გადაწყვიტა გ.პ.-სთვის ეჩვენებინა წარსულში მისთვის ადმინისტრაციული სამართალდარღვევისთვის დაკისრებული ჯარიმები.

აქედან გამომდინარე, საპატრულო პოლიციის მიერ გ.პ.-ს შესახებ ინფორმაციის გადამოწმებას ადგილი ჰქონდა „პერსონალურ მონაცემთა დაცვის შესახებ“ საქართველოს კანონის მე-5 მუხლით გათვალისწინებული საფუძვლის გარეშე, რაც იწვევს პასუხისმგებლობის დაკისრებას ამავე კანონის 43-ე მუხლის შესაბამისად. თუმცა, ამავე კანონის 55-ე მუხლის მე-3 ნაწილის თანახმად, ინსპექტორის მიერ უფლებამოსილი პირი საქმეს განიხილავს საქართველოს ადმინისტრაციულ სამართალდარღვევათა კოდექსით დადგენილი წესით. ადმინისტრაციულ სამართალდარღვევათა კოდექსის 38-ე მუხლის პირველი პუნქტის მიხედვით კი, ადმინისტრაციული სახდელი პირს შეიძლება დაედოს არა უგვიანეს ორი თვისა სამართალდარღვევის ჩადენის დღიდან, ხოლო როცა სამართალდარღვევა დენადია – არა უგვიანეს ორი თვისა მისი გამოვლენის დღიდან. ვინაიდან, საქართველოს შინაგან საქმეთა სამინისტროს მხრიდან პერსონალური მონაცემების საფუძვლის გარეშე გადამოწმებას ადგილი ჰქონდა 2015 წლის 21 ივლისს, ინსპექტორი სამართალდარღვევის ჩადენის ხანდაზმულობიდან გამომდინარე მოკლებულია შესაძლებლობას დააკისროს მონაცემთა დამმუშავებელს „პერსონალურ მონაცემთა დაცვის შესახებ“ საქართველოს კანონით გათვალისწინებულ ადმინისტრაციულ პასუხისმგებლობა.

2. საქართველოს შინაგან საქმეთა სამინისტროს მიერ გ.პ.-ს მიერ ჩადენილი ადმინისტრაციული სამართალდარღვევების შესახებ მონაცემების შენახვის ვადის კანონიერება

„პერსონალურ მონაცემთა დაცვის შესახებ“ საქართველოს კანონის მე-4 მუხლის „ა“ პუნქტის მიხედვით, მონაცემები უნდა დამუშავდეს სამართლიანად და კანონიერად, მონაცემთა სუბიექტის ღირსების შეუღალხავად. ამავე მუხლის „ე“ პუნქტის თანახმად კი, მონაცემები შეიძლება შენახულ იქნეს მხოლოდ იმ ვადით, რომელიც აუცილებელია მონაცემთა დამუშავების მიზნის მისაღწევად. იმ მიზნის მიღწევის შემდეგ, რომლისთვისაც მუშავდება მონაცემები, ისინი უნდა დაიბლოკოს, წაიშალოს ან განადგურდეს ან შენახული უნდა იქნეს პირის იდენტიფიცირების გამომრიცხავი ფორმით, თუ კანონით სხვა რამ არ არის დადგენილი.

გ.პ.-ს განცხადების განხილვის ფარგლებში მიღებული ინფორმაციისა და ჩატარებული შემოწმების შედეგად დადგინდა, რომ საქართველოს შინაგან საქმეთა მინისტრის 2015 წლის 23 იანვრის №53 ბრძანების დანართის მე-6 პუნქტის თანახმად, სამინისტროს ადმინისტრაციული სამართალდარღვევების შესახებ მონაცემების შენახვის ვადად განსაზღვრული აქვს 04 (ოთხი) წელი. ამ ვადის გასვლის შემდგომ კი ხდება მონაცემების უვადოდ დაარქივება. სამინისტროში პერსონალური მონაცემების დაარქივებასთან დაკავშირებული პროცედურა დაიწყო მინისტრის 2015 წლის 23 იანვრის №53 ბრძანების ძალაში შესვლის დღიდან და დასრულდა 2015 წლის 01 ოქტომბერს. შემოწმების ფარგლებში, სამინისტრომ დაადასტურა, რომ 2015 წლის 20-28 ივლისის პერიოდში, 2011 წლამდე გ.პ.-სთვის დაკისრებული ადმინისტრაციული სახდელების შესახებ ინფორმაცია შეიძლება

ხელმისაწვდომი ყოფილიყო საპატრულო პოლიციის თანამშრომლისთვის, ვინაიდან ამ დროისათვის მონაცემების დაარქივების პროცესი მიმდინარეობდა და ჯერ დასრულებული არ იყო.

ზემოაღნიშნულიდან გამომდინარე, საქართველოს შინაგან საქმეთა სამინისტრომ გ.პ.-ს განცხადების განხილვის ფარგლებში, 2015 წლის 01 ოქტომბრამდე, სრულად უზრუნველყო, მის მიერ განსაზღვრული შენახვის ვადის შესაბამისად, ბოლო 04 (ოთხი) წლის წინა პერიოდში ადმინისტრაციული სამართალდარღვევების შესახებ მონაცემების, მათ შორის განმცხადებლის - გ.პ.-ს შესახებ მონაცემების დაარქივება. საპატრულო პოლიციის თანამშრომლებისათვის ავტომობილში დამონტაჟებულ კომპიუტერებში ხელმისაწვდომია მხოლოდ გ.პ.-ს ადმინისტრაციული სამართალდარღვევების შესახებ ბოლო 04 (ოთხი) წლის ინფორმაცია. ბოლო 04 (ოთხი) წელზე ძველი ინფორმაცია აღარ არის ხელმისაწვდომი არც სამინისტროს ცენტრალურ საინფორმაციო ბანკის მონაცემთა ბაზის მომხმარებლისათვის, ბოლო 04 (ოთხი) წელზე ძველ ინფორმაციაზე წვდომა აქვს მხოლოდ სამინისტროს მონაცემთა ბაზის ადმინისტრატორს, რაც გამოწვეულია მონაცემთა სინქრონიზაციის პროცესით.

გ.პ.-ს განცხადების განხილვის ფარგლებში ასევე დადგინდა, რომ 04 (ოთხი) წლის ვადის გასვლის შემდეგ კი სამინისტროს ადმინისტრაციულ სამართალდარღვევათა შესახებ ერთიან საინფორმაციო ბანკში ასახული მონაცემები არქივდება უვადოდ. უკვე დაარქივებულ ინფორმაციულ რესურსებთან წვდომაზე დაშვება კი, ხდება მხოლოდ სამინისტროს საინფორმაციო-ანალიტიკური დეპარტამენტისთვის მონაცემებთან წვდომის საჭიროების შესახებ დასაბუთებული მიმართვის საფუძველზე.

„პერსონალურ მონაცემთა დაცვის შესახებ“ საქართველოს კანონის მე-2 მუხლის „დ“ პუნქტის თანახმად, მონაცემთა დამუშავება არის ავტომატური, ნახევრად ავტომატური ან არაავტომატური საშუალებების გამოყენებით მონაცემთა მიმართ შესრულებული ნებისმიერი მოქმედება, მათ შორის მონაცემების შენახვა. შესაბამისად, სამინისტრო დაარქივების გზით ამუშავებს, კერძოდ, ინახავს პირის მიერ ჩადენილი ადმინისტრაციული სამართალდარღვევების შესახებ მონაცემებს. ზემოაღნიშნული კანონის მე-4 მუხლის „ე“ პუნქტის თანახმად, მონაცემები შეიძლება შენახულ იქნეს მხოლოდ იმ ვადით, რომელიც აუცილებელია მონაცემთა დამუშავების მიზნის მისაღწევად. იმ მიზნის მიღწევის შემდეგ, რომლისთვისაც მუშავდება მონაცემები, ისინი უნდა დაიბლოკოს, წაიშალოს ან განადგურდეს ან შენახული უნდა იქნეს პირის იდენტიფიცირების გამომრიცხავი ფორმით, თუ კანონით სხვა რამ არ არის დადგენილი.

გ.პ.-ს განცხადების განხილვის ფარგლებში, სამინისტრომ ვერ უზრუნველყო ადმინისტრაციული სამართალდარღვევების შესახებ მონაცემების უვადოდ დაარქივების მიზნის და დაარქივების გზით მონაცემთა უვადოდ შენახვის აუცილებლობის მითითება. „პერსონალურ მონაცემთა დაცვის შესახებ“ საქართველოს კანონის დანაწესიდან

გამომდინარე, აუცილებელია დაზუსტდეს სამინისტროს ცენტრალურ საინფორმაციო ბანკში ასახული მონაცემების უვადოდ შენახვის კანონიერი მიზანი და ამ მიზნის მისაღწევად, სამინისტროს მიერ მონაცემების უვადოდ შენახვის აუცილებლობა.

ყოველივე ზემოაღნიშნულის და „პერსონალურ მონაცემთა დაცვის შესახებ“ საქართველოს კანონის მე-4, მე-5, 27-ე, 34-ე, 35-ე და 39-ე მუხლების საფუძველზე,

ინსპექტორმა გადაწყვიტა:

1. დასრულდეს მოქალაქე გ.პ.-ს 2015 წლის 07 აგვისტოს წარმოდგენილ №01/495 განცხადებასთან დაკავშირებული საქმის განხილვა;
2. საქართველოს შინაგან საქმეთა სამინისტროს დაევალოს, არაუგვიანეს 2016 წლის 01 ივლისამდე უზრუნველყოს ცენტრალურ საინფორმაციო ბანკში ასახული ადმინისტრაციული სამართალდარღვევების შესახებ მონაცემების უვადოდ შენახვის კანონიერი მიზნის და ამ მიზნის მისაღწევად, მონაცემების უვადოდ შენახვის აუცილებლობის მითითება, წინააღმდეგ შემთხვევაში, იმ მიზნის მიღწევის შემდეგ, რომლისთვისაც მუშავდება მონაცემები, უზრუნველყოს მათი დაბლოკვა, წაშლა, განადგურება ან პირის იდენტიფიცირების გამომრიცხავი ფორმით შენახვა. შინაგან საქმეთა სამინისტრომ გატარებული ღონისძიებების შესახებ წერილობით აცნობოს ინსპექტორს არაუგვიანეს 2016 წლის 10 ივლისისა;
3. განმცხადებელს და საქართველოს შინაგან საქმეთა სამინისტროს ეცნობოს მიღებული გადაწყვეტილების შესახებ;
4. გადაწყვეტილება შესაძლებელია გასაჩივრდეს მხარეთა მიერ თბილისის საქალაქო სასამართლოში (ქ. თბილისი, დავით აღმაშენებლის ხეივანი, მე-12 კილომეტრი №6) ოფიციალური წესით გაცნობის დღიდან 10 (ათი) დღის ვადაში.

თამარ ქალდანი

პერსონალურ მონაცემთა დაცვის ინსპექტორი